

吞火食炭化為甘露金杵鐵杖變成蓮花飛空步虛而作頌曰

稽首無上道 歸心元始尊 至真妙應主
開化飛玄門 妙戒悟五靈 金書警萬神
察命定錄籍 靈符度苦魂 乘雲朝玉帝
齊契玄中人

太上元始天尊說北帝伏魔神呪妙經卷第六

太上元始天尊說北帝伏魔神呪妙經卷第七

九龍品

第六

爾時天尊在紫微宮中九龍座上青春長齋之月十五日明星皎潔之時與

諸天帝八威神王地下衆靈仙男仙女神男

神女九官仙人飛仙部衆悉在道前稽首長

跪瞻視

聖頌

天尊默然一無所說閉目靜思普念十方無量衆生處在愚冥不聞真正造諸惡業墜死河輪迴五道窮苦所逼誰能悟理獨吾知耳心念是已便復叩齒不覺北帝乘道威力知有所念從北方玄丘絕頂之上與諸真騎浮空而來直詣道前虔心作禮上白

天尊言上聖慈化憫念天人備受灾厄廣為救拔諸天歡樂瑞雲映生地獄無究對之愆天堂荷更生之慶邪妖屏絕六洞不開人天赤子普獲深恩又念窮苦所逼飢寒憂愁不審上聖將何救度如蒙拯濟諸天荷恩天尊告曰子今所請欲令人天貧富一均無

有差別當為汝說成天立地起自無為結氣凝空是因吾教宿命修短得道因緣注上生籍者請南昌之宮去灾榮祿者求於北斗執簿追呼者屬於三官之司利祿獲珍者即須五龍九聖吾今演說各願受持

天尊告曰四天之中有九龍微妙名字善利官祿令土地豐熟灾害不生有求稱遂離諸虛耗日得富昌

天尊告曰龍化無跡因道而生為天帝之威靈衛世人之俸祿其由信也告諸大衆若國土灾厄五穀不豐貧窮困苦衣食不充及諸國人民官祿不遷憂惶相繼諸不稱意名官不昌欲求利益者當先立吾形像置三官之位建九龍之壇晨夕三時焚香行道禮念九龍名字召五方龍王精思北極天符特降龍王即臨受其信心為勅五土之神廣作利益運五方珍寶來降境中國土豐饒無不遂意精誠之者立應其福
道言青龍者是東方七宿角亢之精下降人間護持國土青華宮內化生修吉龍王深林

龍王掌領青色之寶地下雜珎衛護人世青色之衣官祿有人居世願不副心貧窮逃難宜立壇焚香畫形禮拜念誦三日三夜或七日七夜清齋焚請能招東方無極世界青色之寶及青色之衣官祿入人身中消除東方格木之灾凶橫之厄歲星真官即為注籍令人富貴赤龍者是南方七宿井鬼之精下降人間護持國土長生宮內化生多善龍王花雷龍王掌領赤色之寶地下雜珎衛護人世赤色之衣官祿有人居世值諸逆厄官祿不遷七珎不集者宜立壇焚香供養禮拜求頭能招南方無極世界赤色珎寶及赤色之衣官祿入人身中消除火灾口舌之憂見世安樂令人福興白龍者是西方七宿奎婁之精下降人間護持國土素雲宮內化生甘恩龍王善然龍王掌領白色之寶注人世白色之衣官祿管地下七珎有人居世志願不從名宦不達公私賽迫宜立壇焚香獻水禮拜供養啟請能招西方無極世界白色之寶及白色之衣官祿降入人身消除虛耗咒詛之厄


廣利土地令五穀豐登心神安泰公私俱利福祿齊新黑龍者是北方七宿斗牛之精下降人間護持國土太陰宮內化生波流龍王思度龍王掌領黑色之寶及黑色之衣官祿注舟船之道有人居世所願乖違未償素志者宜立壇禮拜能致北方無極世界黑色之寶及黑色之衣官祿入人身中能消水灾船車之厄欲令土地豐稔禮此龍神黃龍者是中央七宿魁魁之精下降人間護持國土高星天內化生離宮龍王掌領黃色之寶及五方庫藏之珎供給萬姓衣食俸祿隨人居處房室之中及名山珎寶窟穴之中及人居世欲求福祿稱意宜立壇禮念能招中央上帝之宮地下黃色珎寶官祿入人身中生業日感貴極王祚萬願從心消除五臟百病之厄及五星臨命之灾鎮星注籍令人福生道言此五方龍王善鎮國土又其九龍善護珎寶化生五方若國土五穀不豐人多饑饉王賦不克逃亡山谷怨聲盈路心欲求安當須置立九龍道場轉經行道天降甘露飢者

自飽五穀早熟花果有味救此饑荒免致命殞龍王之力道言若諸國土分野灾祥四興五穀斷種人民饑荒可以碧玉黃金象牙為簡以三元之日書九龍名字據分野五方釘入地一尺二寸安鎮神龍仍以香花逐位供養七日之後驪宮龍王與北帝大將詣朱明宮開寶藏運七真之具及詣羊山左谷中取五穀來赴此國救濟天人即得豐稔免諸憂悲道言若國土男女生遇醜星惡宿之年五墓四絕之下運命不昌生逢虛耗衣食不充憂惶旦夕百不稱意其欲求福當立壇禮念九龍真形及每月二十六日焚香獻水佩帶九龍真符及五龍大錄精誠專志龍降天威入人宅舍令所求如意立得利宜道言若諸國人民方伯二十石下至今長欲得官祿高遷身無灾難禁斷有方無諸諍訟可以象牙於福生之日東立書此九龍名字以五色袋盛之精誠奉信於所卧之室每至月辰之日以名花異果獻之及淨水供養龍王下降神力護人扶助王化遷官宜祿

道言五虛之鬼姓狼字僧文六耗之鬼姓黃字元蓋每年作人虛耗令人貧困所向不通錢財耗散但念九龍妙典供養禮拜傳授真符即不能侵擾虛耗之鬼助人作福

道言吾所說五龍九聖安鎮五方九宮分野所以者何龍王上統九天天下安九地等仙官之靈威升天入地傳言負絲出幽入微年壽萬歲精通至道若世間有通靈徹聖之者修真悟道之人及國王大臣及行軍戰陣悉用神龍扶助而得勝也體生於無皆稟靈也天地萬物皆因道法起教證焉道君告北帝曰有形之聖莫過於龍復能降雨興雲感動天地善護珍寶吐琅玕寶珠致物與人守連環寶珠江湖洞穴壘明月寶珠龍宮內殿無價瑩珠奇不可說是以保家安國若有人持念此北帝九龍妙典設法行道國中人民有疾苦者悉得安愈金銀湧出八苦消停衆善和合法音流布無不獲福分野歡樂悉證無為爾於未聞要在宣傳道言若下元生人住宅凶耗居處不安頻有疾疢可建立五龍道場

日夕三時轉經行道當降仙官及勅八卦大神月德六合及五龍王入其宅舍為消虛耗逐去邪精安貼官室鎮守宅宇保子宜孫廣招官祿致五色珍寶入於家庭永代安和富貴無極



道言九龍真符宜官利祿能令人富貴萬願從心有佩此文諸灾不染官私敬愛此符有龍神徒官九人玉女十二人六甲將軍八萬人童子六人及北帝大將軍常來衛護上消天灾下散地禍無願不從自非虔仰不敢妄

傳於是仙眾而作頌曰

龍化本無蹤有跡生道宗遠遊九天際息駕六領官提携高上賓及我素靈同道場虛寂內靈歌發太空形感至寂庭思詠帝微通龍吟統官府鳳嘯太霄館靈唱無留味衆音承風散誰能救此章精誦素靈讚以解三塗過拔出九玄難度誠禮太虛福慶凌霄漢九龍映明珠二景對真光雲飛啓翔會玄象及扶桑冥慶自相扶陰陽朗八荒五星光輝耀神龍演紀綱若能修至道道遙入紫鄉

道君告北帝曰此九龍妙典非人不傳若家有此經能招珍寶無價明珠告諸真子善思念之廣修至道接引迷途功成德遂昇入無形精德加重生南上官離諸邪境耳聞妙音足乘五雲口饒甘露變化無窮爾時座中大眾聞說九龍妙典及五方龍王本源各生歡雅諸方世界七寶湧出免諸饑乏六合清平天無妖穢五穀豐登衆真作禮傳化奉行太上元始天尊說北帝伏魔神咒妙經卷第七